



a cura di Isabella Descalzo

**Corinna Praga, *Andar per creuse oltre il Centro Storico*, Erga Edizioni, Genova 2016, pagg. 96, 144, 64**

L'aotrice a n'è consumòu de sêue, sciù e zù pe-e montæ de Zena! Convinta, giustamente, che a belessa da nòstra çitæ a no segge solo into Centro Stòrico, za trent'anni fa a l'àiiva publicòu o libbro *Andar per creuse*, che òua a ne riproponn-e arichîo e divizo inte trei libretti ciù picin, cò-modi da portase inta stacca anche un pe vòtta.


Drento gh'è ben descritti i unze percorsci che da-o centro van a-e çinque pòrte de Miage Neuve: stradde in scê quæ pe secoli a gente a l'è caminòu, no pe spasso comme poemmo fâ niatri òua, gòdindose i bèlli panorammi, ma perché no gh'ea atro mòddo pe anà inte l'entrotæra. Chi no peu ciù caminà o se contente de amià e tantiscime bèlle fotografie a colori e leze e interessanti nòtte de aprofondimento.



**Daniele D. Caviglia, *A-o de là do mâ – Poexie zeneixi 1996-2016*, Editrice Zona, Lavagna 2017, pagg. 80**

O Caviggia o l'è stæto vice prescidente da Compagna; o l'è 'n inzegnê ch'o l'insegna l'elettrònica a l'universcitæ, ma o l'è in cheu de poëta e pe questo o l'è goagnòu doe vòtte o premio *Lauro d'Oro* pe-a poexia in lengoa ligure. Into titolo de questa recugèita o zeuga co-i doî significati da paròlla "mâ", e perché questa còsa a segge ciù ciæa o gh'a misso a traduçion italiann-a ascì: *Oltremale*.

I sò vèrsci xêuan èrto, no en fæti pe ninâseghe; pàrlan d'Amò co-a A maiòscola e de tutto quello che remescia inte 'n anima in continoa tenscion tra-a Tæra e o Çê, de longo in alërta comme in *radar* pe cheugge i segnali da vitta.



**Luciano Venzano, *Chiese di S. Bernardo di Carnoli e N.S. della Misericordia di Crovi – Genova Voltri*, Genova 2016, pagg. 64**

**Luciano Venzano, *San Carlo di Cese – Una Parrocchia e il suo territorio*, Ateneo Edizioni, Genova 2017, pagg. 182**

Doî libbri in sce de localitæ do Ponente no goæi conosciue e frequentæ da chi no sta da quelle parte. Càrnoli a l'è inta valadda do Léira, subito a-e spalle de Otri, e a l'è 'na stòia testimoniâ armeno da-o 1184 e chi ricostroia atraverso i documenti da Gexa. San Carlo a l'è inta valadda do Varenna, entrotæra de Pêgi, e anche chi a stòia a parte da lontan, da-o 1173, e a se desgheugge stavòtta atraverso a sucescion di prævi ch'an rêtto a paròcchia. In ciù se parla de toponomastega, de ambiente, de uxi e tradiçoin, de famigge locali (con tanto de stemmi). Tutti e doî i libbri en arichîi da bèlle fotografie in gianco e neigro e a colori, che invîtan a 'na vixita.

